

四庫全書

子部

欽定四庫全書

廣博物志卷四十四

明 董斯張 撰

鳥獸一 諸鳥上

夷貊掌鳥言貉貊掌獸言

周禮

羅氏掌羅鳥鳥蜡則作羅襦中春羅春鳥獻鳩以養國  
老行羽物

掌畜掌養鳥而阜蕃教擾之祭祀共卵鳥歲時貢鳥物

共膳獻之鳥

翼氏掌攻猛鳥各以其物為媒而掎之以時獻其羽翮  
若簇氏掌覆天鳥之巢以方書十日之號十有二辰之  
號十有二月之號十有二歲之號二十有八星之號縣  
其巢上則去之

庭氏掌射國中之天鳥若不見其鳥獸則以救日之弓與  
救月之矢夜射之若神也則以太陰之弓與枉矢射之

射鳥氏掌射鳥祭祀以弓矢毆鳥鳶凡賓客會同軍旅

亦如之射則取矢矢在侯高則以并夾取之

並上

金水之子其名曰羽蒙乃之羽民是生百鳥

歸歲啓筮

孟虧人首鳥身其先為虞氏馴百禽夏后之末民始食

卯孟虧去之

括地圖

武帝問朔何知鳥之雌雄對曰雄左翼加右聲高雌右

翼加左聲小

方朔傳 一云燒毛納水中沈者雄浮者雌

陸鳥曰棲水鳥曰宿獨鳥曰止衆鳥曰集

禽經

人面擊地飛鳥自下

取槩木為人形似鳥而血塗人面以擊地鳥自飛下

萬畢術

鳥銜人之髮夢飛

衆鳥羣飛徘徊軍上不過三日有暴兵至鳥聚軍中將軍當賞功增秩鳥集將軍之旗將軍增官鳥集軍中莫

知其名軍敗

抱朴子  
軍術

小鳥生大鳥王者土地開闢則至

宋書

平原管輅善卜筮解鳥語

渤海劉長仁有辯才初雖聞輅能曉鳥鳴後每見難輅曰夫生民之音曰言鳥獸之音曰鳴故言者則有知之

貴靈鳴者則無知之賤名何由以鳥鳴為語亂神明之所異也輅答曰夫天雖有大象而不能言故運星精於上流神明於下驗風雲以表異役鳥獸以通靈表異者必有浮沈之候通靈者必有宮商之應是以宋襄失德六鷁並退伯姬將焚鳥唱其災四國未火融風已發赤烏夾日殃此荆楚此乃天上之所使自然之明符考之律呂則音聲有本求之人事則吉凶不失昔在秦祖以功受封葛盧聽音著在春秋斯皆典謨之實非聖賢之

虛名也商之將興由一燕卵也文王受命丹鳥銜書此  
乃聖人之靈祥周室之休祚何賤之有乎夫鳴鳥之聽  
精在聽火妙在入神自非斯倫猶子路之於死生也長  
仁言君辭雖茂華而不實未之敢信須臾有鳴鵲之驗

長仁乃服

管輅別傳  
以下鸞鳳

羽嘉生飛龍飛龍生鳳皇鳳皇生鸞鳥鸞鳥生庶鳥凡  
羽者生於庶鳥毛犢生應龍應龍生建馬建馬生麒麟  
麒麟生庶獸凡毛者生於庶獸介鱗生蛟龍蛟龍生鯢

鯁鯁生建邪建邪生庶魚凡鱗者生於庶魚介潭生

先龍先龍生玄龜玄龜生靈龜靈龜生庶龜凡介者生

於庶龜

淮南子

龍之鱗八十有一鯉之鱗三十有六麟肉角而不觸鳳

肉喙而不啄蛟骨青鳳骨黑玄覽

鹿角牛耳駝首鬼目蛇項蜃腹魚鱗虎掌鷹爪龍之狀

也鴻前麇後蛇頸魚尾鶴頰鴛腮龍文龜背燕頤雞喙

五色備舉鳳之狀也麕身牛尾狼頭馬足圓蹠肉角麟



之狀也上

鳳皇者鶉火之禽陽之精也麒麟者玄枵之獸陰之精

也鶉冠子

龍鱗有文於地為神鳳羽五色於鳥為君虎猛毛蚡蚺

龜知背負文四者體不質於物為聖賢論衡

麟不吠守鳳不司晨騰黃不引犁尸祝不代庖抱朴子

萬雀不及一鳳皇衆星不及一月明張顯折言

鳳翥鸞舉百羽從之鳳靡鸞叱百鳥瘞之禽經

鳳鳥首文曰德翼文曰順膺文曰仁背文曰義見則天

下和

山海經

木行為仁為青鳳頭上青故曰戴仁也金行為義為白  
鳳纓白故曰纓義也火行為禮為赤鳳背赤故曰負禮  
也水行為智為黑鳳胸黑故曰向智也土行為信為黃

鳳足下黃故曰蹈信也

抱朴子

按禮記瑞命篇云雄曰鳳雌曰皇雄鳴曰節節雌鳴曰

足足

夫鳳象鴻前鱗後蛇頸而魚尾龍文而龜身燕頤而雞喙戴德負仁抱忠挾義小音金大音鼓延頸奮翼五彩備明舉動八風氣應時雨食有質飲有儀往即文始來即嘉成唯鳳為能通天祉應地靈律五音覽九德天下有道得鳳象之一則鳳過之得鳳象之二則鳳翔之得鳳象之三則鳳集之得鳳象之四則鳳春秋下之得鳳象之五則鳳沒身居之

韓詩外傳 說苑說鳳狀又云鶴植鴛鴦駢翼而中注

鳳晨鳴曰發明晝鳴曰保長飛鳴曰上翔集鳴曰歸昌

翼挾義衷抱忠足履正尾繫武為能究萬物通天祉象

百狀達於道去則有災見則有福

說苑

行鳴曰歸嬉止鳴曰提扶夜鳴曰善哉晨鳴曰賀世

春秋

巴潛潭

鳳畫鳴曰滿昌昏鳴曰固常夜鳴曰保長

宋書

鳳有六像九苞六像者一曰頭象天二曰目像日三曰

背像月四曰翼像風五曰足像地六曰尾像緯九苞者

一曰口苞命二曰心合度三曰耳聽達四曰舌屈伸五

曰彩色光六曰冠矩州七曰距銳鉤八曰音激揚九曰

腹戶行

論摘  
哀聖

五鳳皆五色為瑞者一為孽者四其四皆似鳳並為妖  
一曰鸛鷓鳩喙圓目身義戴信嬰禮膺仁負智至則役  
之感也二曰發明鳥喙大頸身仁戴智嬰義膺信負禮  
至則喪之感也三曰焦明長喙疏翼圓尾身義戴信嬰  
仁膺智負禮至則水之感也四曰幽昌兑目小頭大身  
細足身智戴信負禮膺仁至則旱之感也說文曰五方

神鳥東方曰發明南方曰焦明西方曰鵬鷖北方曰幽

昌中央曰鳳皇

樂叶  
圖徵

西有鴝雀東有諫珂北有定甲南有錦駝鷓鷯飛光而

映天綬雞曳彩而駢羅竊鳳形而似者也

楊用  
修集

青鳳謂之鵙赤鳳謂之鶉黃鳳謂之鸞白鳳謂之鵠紫

鳳謂之鶩

禽經  
禽虫述云蔡  
衡識鶩辨青赤之文

鸞一曰雞趣赤曰丹鳳青曰羽翔白曰化翼玄曰陰翥

黃曰土符

禽虫  
述

鸞鳥似鳳而白纓聞樂則蹈節而舞

崑崙圖

南方有比翼鳳飛止飲啄不相分離雄曰野君雌曰觀  
諱總名曰長離言常想離著也此鳥能通宿命死而復  
生必在一處紂時集於長桐之上人以為雙頭鳥不祥  
及文武興始悟曰此並興之瑞也

瑯環記

逸詩曰鳳皇秋秋其翼若干其聲若簫有鳳有皇樂帝  
之心此不蔽之福也

荀子

說文朋及鵬皆古文鳳字宋玉曰鳥有鳳而魚有鯢莊

子音義崔譔云鵬音鳳

天樞得則鳳皇翔

春秋運斗樞

鎮聲不逆行則鳳皇至

樂動聲儀

軒丘鳳卵民食之甘露民飲之

山海經

南海中有軒轅丘鸞自歌鳳自舞古云天帝樂也

述異記

拾朝陽之遺卵納丹穴之飛凰

陸機七徵

西王母曰僊之上藥有九色鳳頸次藥有蒙山白鳳之

肉

漢武內傳



太真丈人登白鸞之車駕黑鳳於九源自天以下莫不

範德

白羽經

黃帝修德立義天下大治乃召天老而問焉余夢見兩  
龍挺白圖以授余於河之都天老曰河出龍圖雒出龜  
書紀帝錄列聖人之姓謀治太平然後鳳皇處之今鳳  
皇以下三百六十日矣天其授帝圖乎黃帝乃祓齋七  
日至於翠嫵之川大鱸魚折溜而至乃與天老迎之五  
色畢具魚泛白圖蘭葉朱文以授黃帝名曰錄圖

河圖  
挺佐

輔 韓詩云黃帝服黃衣戴黃  
寃致齋于宮鳳乃蔽日而至

黃帝坐於扈閣鳳皇銜書致帝前其中得五始之文

春秋

緯 扈閣河  
圖作玄扈樓

堯坐中舟與太尉舜臨觀鳳皇負圖授堯赤玉為押黃

金檢白玉繩其章曰天赤帝符璽五字

春秋合誠圖

舜父有目疾在家邑市而居舜父夜卧夢見一鳳皇自

名為雞口銜米以占言雞為子孫視之是鳳皇以黃帝

夢書占之此子孫當有貴者舜占猶之比年糴稻穀中

有錢舜三日三夜仰天自告過前敌之日霍然開

劉向孝子

傳

帝舜曰朕惟不入百獸鳳晨

中候注百獸率舞鳳皇司晨鳴

有鳳皇銜書游文王之都書文曰殷帝無道虐亂天下

皇命已移不得復久靈祇遠離百神吹去五星聚房昭

理四海

宋志

周成王時鳳皇來舞於庭成王乃援琴而歌曰鳳皇來儀百獸晨又曰鳳皇翔兮於紫庭余何德兮以感靈賴

先人兮恩澤臻于胥樂兮民以寧

琴操

旃塗國獻鳳雛載以瑤華之車飾以五色之玉駕以赤象至於京師育於靈禽之苑飲以瓊漿飴以雲實鳳初至之時毛色文彩彪發及成王封泰山禪社首之後文彩炳耀成王崩冲飛而去孔子相魯之時有神鳳遊集至哀公之末不復來翔故云鳳鳥不至可為悲矣

拾遺記

塗修國獻青鳳丹鵲各一雌一雄孟夏之時鳳鵲皆脫易毛羽聚鵲翅以為扇緝鳳羽以飾車蓋也扇一名遊

飄二名徐翮三名虧光四名仄影時東甌獻二女一名  
延娟一名延娛使二人更搖此扇侍於王側輕風四散  
冷然自涼此二人辯口麗辭巧於歌笑步塵上無跡行  
日中無影及昭王淪於漢水二女與王乘舟夾擁王身  
同溺於水故江漢之人到今思之立祀於江湄號曰招  
祇之祠綴青鳳之毛為二裘一名煩質二名暄肌服之  
可以却寒至厲王流於彘彘人得而竒之分裂此裘遍  
於彘土罪人大辟者抽裘一毫以贖其罪則價值萬金

上

老子見孔子從弟子五人問曰為誰對曰子路為勇其次子貢為智曾子為孝顏回為仁子張為式老子嘆曰吾聞南方有鳥其名為鳳皇鳳皇之所居也積石千里河水出下鳳鳥居止天為生食其樹名瓊枝高百仞以瓊琳瑯玕為實天又為生離珠一人三頭遞卧遞起以司瑯玕鳳鳥之文戴聖嬰仁右智左賢

莊子逸篇

燕昭王時有白鸞孤翔銜千莖穰穰於空中自生花實

落地則生根葉一歲百獲一莖滿車故曰盈車嘉榘

拾遺

記

豫章洪井有鸞岡洪厓先生乘鸞所憩泊也

水經注

公輸之刻鳳也冠距未成翠羽未樹人見其身者謂之

鳩鷄見其首者名曰鷓鴣皆嘗其醜而笑其拙及鳳之

成翠冠雲聳朱距電搖錦身霞散綺翮焱發翩然一翥翻

翔雲棟三日而不集然後讚其竒而稱其巧

劉子

楚人擔山雉者路人問何鳥也擔雉者欺之曰鳳皇也

路人曰汝販之乎曰然進十金弗與請加倍乃與之將欲獻楚王經宿而鳥死國人傳之咸以為真鳳皇貴欲以獻之遂聞楚王王感其欲獻於已召而厚賜之過於買鳥之金十倍

尹文子

西方衛羅國王有女字曰配瑛與鳳共處於是靈鳳常以羽翼扇女面後十年中女忽有胎王意怪之因斬鳳頭埋著長林丘中後生女名曰皇妃王女思靈鳳之游好駕而臨之長林丘中歌曰杳杳靈鳳綿綿長歸悠悠



我思永與願違萬劫無期何時來飛是鳳鬱然而生抱

女俱飛逕入雲中

洞玄本  
行經

益州有葉榆縣西北十里有弔鳥山衆鳥十百為羣鳴  
呼啁晰每歲七八月至十六七日則止俗言鳳皇死於

此山故衆鳥來弔因名曰弔鳥焉

水經  
注

虜蘇割刺在答魯之右大澤中高百尋然無草木石皆  
赭色山產椒椒大如彈丸然之香徹數十里每然椒則  
有鳥自雲際翩躚五色名赭爾鳥蓋鳳皇種也昔漢武

帝遣將軍趙破奴逐匈奴得其椒不能解以問東方朔  
朔曰此天仙椒也塞外千里有之能致鳳武帝植之太  
液池至元帝時椒生果有異鳥翔集

燉煌新錄

宣帝以皂蓋車一乘賜霍光悉以金鉸具至夜車轄上  
鳳皇輒亡去莫知所之至曉乃還如此非一守車人亦  
嘗見後南郡黃君仲北山羅鳥得鳳皇入手即化成紫  
金毛羽冠翅宛然具足可長尺餘守車人云今月十二  
日夜車轄上鳳皇俱飛去曉則俱還今則不返恐為人

所得光甚異之具以列上後數日君仲詰闕上鳳皇子  
云今月十二夜北山羅鳥所得帝聞而疑之置承露盤  
上俄而飛去帝使尋之直入光家止車轄上乃知信然  
帝取其車每遊行輒乘御之至帝崩鳳皇飛去莫知所  
在嵇康詩云翩翩鳳轄逢此網羅

續齊  
諧記

揚雄讀書有人語之曰無為自苦玄故難傳忽然不見  
雄著太玄經夢吐鳳皇集玄之上頃而滅

西京  
雜記

王阜為重泉令鸞鳥集止學官阜使掾沙疊為張雅樂

擊磬鳥舉足垂翼應聲而舞止縣庭留十餘日乃去

東觀

漢記

當陽南有龍川鳳川云漢武帝時八龍五鳳常見於此亦呼為五鳳川

許真君遜字敬之吳赤烏二年己未母夫人夢金鳳銜珠墜於掌中玩而吞之及覺腹動因是有娠而生真君

馬

真僊通鑑

吳主亮命工人潘芳作金螭屏風鏤祥物一百三十種

種種有生氣一日與夫人戲觸屏墜其二鳳頤之飛去

芳字林仲

珠記事

鳳陽門五層樓去地三十丈安金鳳皇二頭石虎將衰

一頭飛入漳河

楊龍驤洛陽記

徐陵母臧氏夢五色雲結為鳳集左肩已而誕陵

陳書以

鶴下

鶴者陽鳥也而遊於陰因金氣依火精以自養金數九

火數七故稟其純陽也生二年子落毛而黑毛易三年

頂赤為羽翮其七年小變而飛薄雲漢復七年聲應節  
而晝夜十二時鳴鳴則中律百六十年大變而不食生  
物故大毛落而茸毛生乃潔白如雪故泥水不能汚或  
即純黑而淄盡成膏矣復百六十年變止而雌雄相視  
目睛不轉則有孕千百六年形定飲而不食與鸞鳳同  
羣胎化而產為仙人之騏驥矣夫聲聞於天故頂赤食  
於水故喙長軒於前故後指棲於陸故足高而尾凋翔  
於雲故毛豐而肉疎且大喉以吐故修頸以納新故天

壽不可量所以體無青黃二色者土木之氣內養故不  
表於外也是以行必依洲嶼止不集林木蓋羽族之清  
崇者也玉策記曰千載之鶴隨時而鳴能翔於霄漢其  
未千載者終不及於漢也其相曰瘦頭朱頂則冲霄露  
眼黑睛則視遠隆鼻短喙則少瞑眦頰鼯耳則知時長  
頸疎身則能鳴鴻領鵠膺則體輕鳳翼雀尾則善飛龜  
背鼈腹則伏產軒前垂後則會舞高脰麤節則足力洪  
髀纖指則好翹聖人在位則與鳳皇翔於郊甸

周浮丘  
伯相鶴

經

湘東王修竹林堂新陽太守鄭裒進雌鶴於堂留其雄者尚在裒宅霜天月下無日不鳴商旅江津聞者墮淚時有野鶴飛赴堂中驅之不去即其雄也交頸撫翼聞

奏鍾磬翻然共舞宛轉低昂妙契絃節

渚宮故事

梁安成王秀性仁恕喜愠不形於色左右嘗以石擲殺

所養鵠齋師請治其罪秀曰我豈以鳥傷人

梁書

鷺目成而受胎鶴影接而懷卵鴛鴦交頸野鶴傳枝

變化



論

鶴以怨望雞以嗔睨鶴以潔唳梟以凶叫鴟以愁嘯鶩

飛則蜮沈鴟鳴則蛇結

師曠禽經

鵠即是鶴音之轉後人以鵠名頗著謂鶴之外別有所

謂鵠故埤雅既有鶴又有鵠

爾雅翼

孟古之言鵠不日浴而白白即鶴也鵠名咭咭咭鶴也  
以龜龍鴻鵠為壽壽亦鶴也故漢昭時黃鵠下建章  
宮太液池而歌則名黃鶴神異經鶴國有海鵠其餘諸

書文或為鶴或為鵠者甚多以此知鶴之外無別有所

謂鵠也

相鶴經云是李浮丘授王子晉王子晉授崔文子崔文子藏嵩山石室中淮南八公得之以傳

於世然其所論似止及青田一種耳

鶴亦有蒼色者謂之赤頰

詩義疏

鴉有隱巢故鷲鳥莫能見鶴有長水石能於巢中養魚而水不涸

鶴左右脚裏第一指名兵爪

天中記

江陵澤中多有鶴遂呼江陵郡名為鶴澤

方輿勝覽

崆峒山廣成修道之所絕壁有石穴謂之皂鶴洞鶴頂

如丹毛羽皆黑日照之金色粲然

墨客揮犀

大興二年冬大雪南州人見二白鶴語於橋下曰今茲

寒不減堯崩年也於是飛去

異苑

宮人進白鵠之血以飲天子以洗天子之足

穆天子傳

周穆王南征一軍盡化君子為獒為鵠小人為蟲為沙

抱朴子

魏文侯使舍人毋擇獻鵠於齊侯毋擇行道失之徒獻

空籠見齊侯曰寡君使臣毋擇獻鵠道饑渴臣出而飲  
食之而鵠飛冲天遂不復反念思非無錢以買鵠也惡  
有為其君使輕易其幣者乎念思非不能拔劍刎頭腐  
肉暴骨於中野也為吾君貴鵠而賤士也念思非不敢  
走陳蔡之間也惡絕兩君之使故不敢愛身逃死來獻  
空籠唯主君斧鑕之誅齊侯大悅曰寡人今者得茲言  
三賢於鵠遠矣寡人有都郊地百里願獻子大夫以為  
湯沐邑毋擇對曰惡有為其君使而輕易其幣而利諸

侯之地乎遂出不反

劉向  
說苑

始元元年黃鵠下太液池上為歌曰黃鵠飛兮下建章

羽蕭蕭兮行踟躕金為衣兮菊為裳唼喋荷荇出入蒹

葭自顧菲薄愧爾嘉祥

西京  
雜記

天姥山南峰昔魯班刻木為鶴一飛七百里後放於北

山西峰上漢武帝使人往取之遂飛上南峰往往天將

雨則奮翅動搖若將飛奮

述異  
記

有童子遙見有黃鵠白首鼓翅於帝前即方朔著黃綾

單衣頭已斑白

洞冥記

張禧字彥祥除燉煌令常有鶴負矢集禧庭以甘草湯洗之傳藥留養十餘日瘡愈飛去月餘銜赤玉珠二枚

置禧廳前

張氏家傳

蘇耽桂陽人少以至孝著稱一日白母道果已圓升舉有日母曰我獨恃爾爾去我何依耽乃留一櫃封鑰甚固若有所需告之如所願也預為植橘鑿井及郡人大疫但食一橘葉飲一匙水即愈後一鶴降郡屋久而不

去郡僚子弟彈之鶴乃舉足畫屋若書字焉其辭云鄉  
原一別重來事非甲子不記陵谷遷移白骨蔽野青山  
舊時翹足高屋下見羣兒我是蘇仙彈我何為翻身雲

外却返吾居

神仙傳

吳隱之執喪過禮家貧無人助哭每至哭卧之時常有雙

鶴鳴叫

晉書

晉安帝元興中一人年出二十未婚然目不干色曾無  
穢行嘗行見一女甚麗謂少年曰聞君自以柳季之儔

亦復有桑中之歡耶女便歌少年微有動色後復重見  
之少年問姓云姓蘇名瓊家在途中遂邀還盡歡從弟  
突入以杖打女即化雌白鵠

廣記

噲叅養母至孝曾有玄鶴為戎人所射窮而歸叅收養  
療治瘡愈放之後鶴夜到門外銜明月珠以置叅家

述異

記

慧約初卧疾時見一老公執錫來入及遷化日諸僧咸  
卜寺之東巖帝乃改葬獨龍抑其前見之叟則誌公相



迎者乎又臨終夜所乘青牛忽然鳴吼淚下交流至葬日勅使牽從部伍發寺至山吼淚不息又建塔之始白鶴一雙繞墳鳴唳聲甚哀婉葬後三日歛然永逝

神僧傳

滎陽縣南百餘里有蘭巖山峭拔千丈常有雙鶴素羽皦然日夕偶影翔集相傳云昔有夫婦隱此山數百年化為雙鶴不絕往來忽一旦一鶴為人所害其一鶴歲常哀鳴至今響動巖谷莫知其年歲也

搜神記

宋京師祇洹寺有釋僧苞本是京兆人少在關受學什

公宋永初中遊北徐入黃山精舍復造靜定二師進業  
仍於彼建三七普賢齋懺至第十七日有白鶴飛來集  
普賢座前日中行香畢乃去至二十一日將暮又有黃  
衣四人遶數匝忽然不見

法死  
珠林

煬帝造儀衛課州縣送羽毛堪斃衣之用者殆無遺類  
烏程有鶴巢樹高百尺伐其樹鶴恐傷子自拔斃毛投

于地

廣五行記  
以下鴈

鴈自關而東謂之駟馘

音加

南楚之外謂之馘或謂之鶻

駟今江東通呼  
為駟方言

鸛鷓之信不如鴈周周之知不如鴻禽

經

鄒穆公有令食鳧鴈者必以糝毋敢以粟於是倉無糝  
而求易於民二石粟得一石糝吏請以粟食之公曰去  
非而所知也夫百姓煦牛而耕曝背而耘苦勤而不敢  
惰者豈為鳥獸也哉粟米人之上食也奈何其以養鳥  
也且汝知小計而不知大會賈子

定州唐縣中有鴻山關者昔項羽於此關見羣鴻乃誓

衆曰我當南面必中其一引滿射之莫有中者乃折弓  
投地而去

上虞縣有鴈為民田春拔野草根秋啄除其穢是以縣  
官禁民不得妄害此鳥犯則有刑無赦

十三  
州記

鴈鵠集於會稽去避碣石之寒來遭民田之畢蹈履民  
田啄食草糧糧盡食索春雨適作避熱北去復之碣石

論  
衡

鴈銜蘆而捍網牛結陳以却虎

尸  
子

虞季鴻少有孝行為日南太守嘗有鴈止宿廳事上虞  
每行縣輒飛逐焉及卒官鴈隨喪至餘姚墓前歷三年

乃去

典錄

石虎饗羣臣於太武殿前有白鴈百餘集於馬道南命  
射之無所獲太史令趙攬以為白鴈集庭宮室將空

十六

國春  
秋

迦尸國有五百鴈為羣侶爾時鴈王名曰賴吒鴈王有  
臣名曰素摩時此鴈王為獵師捕得五百羣鴈皆棄飛

去惟有素摩隨逐不捨語獵師言請放我王以身代之  
獵師不聽遂以鴈王獻梵摩曜王鴈王曰惟願大王放  
一切鴈使無所畏五百羣鴈在王殿上空中作聲時王  
問言此是何鴈鴈王言是我家屬王即施無畏不聽殺

鴈

法苑珠林

爾時般遮羅國以五百白鴈獻波斯匿王王令送著祇  
恒精舍衆僧食時人人乞食鴈見僧聚來在前立佛以  
一音說法衆生各得類解當時羣鴈亦解僧語聞法歡

喜鳴聲相和還於池水後毛羽轉長飛至餘處獵師以  
網都覆殺之一鴈作聲諸鴈皆和謂聽法時聲乘是善  
心生忉利天生天之法法有三念一念本所從來二念  
定生何處三念先作何業得來生天使自思惟自見宿  
因更無餘善唯佛僧邊聽法作是念已五百天子即時  
來下在如來邊佛為說法悉得須陀洹波斯匿王遇到  
佛所常見五百鴈羅列佛前是日不見便問佛言此中  
諸鴈向何處去佛言欲見諸鴈者先鴈飛去他處為獵

師所殺命終生天

雜寶藏經  
以下鵝鷓

佛告諸比丘過去世時阿練若池水邊有二鴈與一龜  
共結親友後時池水涸竭二鴈作是議言今此時水涸  
竭親友必受大苦議已語龜言此池水涸竭汝無濟理  
可銜一木我等各銜一頭將汝著大水處銜木之時慎  
不可語即便銜之經過聚落諸小兒見皆言鴈銜龜去  
鴈銜龜去龜即瞋言何預汝事即便失木墮地而死

法苑

珠林



昔有菩薩現為鸚鵡常處于樹風吹彼樹更相切摩便有火出火漸熾盛遂焚一山鸚鵡思惟猶如飛鳥軀止于樹故當反復起報恩心何況于我長夜處之而不滅火即往詣海以其兩翅取大海水至彼火上而灑于火或以口灑東西馳奔時有善神感其勤苦尋為滅火又智度論云昔野火燒林林中有一雉勤身自力飛來入水以水灑林往返疲乏不以為苦時天帝釋來問之言汝作何等答曰我救此林愍衆生故此林產育處居日

久清涼快樂我諸種類及諸宗親皆悉依仰皆有身力  
云何不救天帝問言汝乃精勤當至幾時雉言以死為  
期天帝言誰為汝證即自立誓我心至誠信不虛者願  
火即自滅是時淨居天知雉弘誓即為滅火始終常茂

不為火燒

僧迦羅  
刹經

乾羣一名鸚鵡

萬畢  
術

鸚鵡摩其背而瘖鸚鵡翦其舌而語

禽  
經

廣南多鸚鵡食木葉榕實凡養之俗忌以手類觸其背

犯者即多病顛而卒土人謂為鸚鵡瘴

有鸚鵡飛集他山山中禽獸輒相貴重鸚鵡自念雖樂不可久也便去後數月山中大火鸚鵡遙見便入水濡羽飛而洒之天神言汝雖有志意何足云也對曰雖知不能救然嘗僑居是山禽獸行善皆為兄弟不忍見耳

天神嘉感即為滅火

張華感應類從志

曾有白頭鳥集殿前權曰此何鳥也恪曰白頭翁也張昭自以坐中最老疑恪以鳥戲之因曰恪欺陛下未嘗

聞鳥名白頭翁者試使恪復求白頭母恪曰鳥名鸚母  
未必有對試使輔吳復求鸚父昭不能答坐中皆歡笑

江表  
傳

張華有白鸚鵡華每出行還輒說僮僕善惡後寂無言  
華問其故荅曰見箴甕中何由得知公後在外令喚鸚  
鵡鸚鵡曰昨夜夢惡不宜出戶公猶強之至庭為鸚所  
搏教其啄鸚脚僅而獲免

異  
苑

河間王琛有妓曰朝雲善歌又有綠鸚鵡善語朝雲每

歌鸚鵡和之聲若出一環愛之號為綠朝雲

採蘭雜志

隋時柳歸舜泛舟巴陵風飄至一處有鸚鵡數千相呼

姓字有名武遊郎者有名阿蘇兒者有名武僊郎者有

名自在先生者有名踏蓮露者有名鳳花臺者有名戴

蟬兒者有名多花子者

幽怪錄

昔佛在世時舍衛國中須達長者信敬佛法為僧檀越  
衆僧所須一切供給須達家內有二鸚鵡一名律提二  
名賒律提稟性黠慧解人言語見比丘來先告家內令

出迎送阿難後時到長者家見鳥聰黠為說四諦苦集  
滅道門前有樹二鳥聞法飛向樹上歡喜誦持夜在樹  
宿野狸所食緣此善根生四王天盡彼天壽生忉利天

賢愚  
經

佛告諸比丘過去世時雪山根底曲山壅中有向陽處  
衆鳥雲集便共議言我等今日當推舉一鳥為王令衆  
畏難不作非法衆鳥議言善誰應為王有一鳥言當推  
鷓鴣有一鳥言此事不可何以故高脚長頸衆鳥脫犯

啄我等腦衆咸言爾復有一鳥言當推鷲為王其色絕  
白衆鳥所敬衆鳥復言此亦不可顏貌雖白項長且曲  
自項不直安能正他是故不可又復衆言正有孔雀衣  
毛綵飾觀者悅目可應為王復言不可所以者何衣毛  
雖好而無慚愧每至僻時醜形出現是故不可有一鳥  
言土梟為王所以者何晝則安靜夜則伺守能護我等  
堪為王者衆咸可爾有一鸚鵡在一處住而多智慧作  
是念言衆鳥之法夜應眠息晝則求食是土梟法夜寤

晝則多睡而諸衆鳥圍侍左右晝夜警宿不復眠睡甚  
為苦事我今設語彼當瞋恚拔我毛羽正欲不言衆鳥  
之類長夜受困寧受拔毛不越正理便到衆鳥前舉翅  
恭敬白衆鳥言願聽我說如前意見爾時衆鳥即說偈  
答點慧廣知義不必以年耆汝年雖幼小智者宜時說  
爾時鸚鵡聞衆鳥說即說偈言若從我意者不用土梟  
王歡喜時覩面常令衆鳥怖況復瞋恚時其面不可觀  
時衆鳥咸言實如所說即共集議此鸚鵡鳥聰明點慧



堪應為王便拜為王佛告諸比丘彼時土泉者今闍陀  
比丘是鸚鵡鳥者今阿難是

律僧祇

昔過去久遠雪山之中有一鸚鵡父母都盲常取好果  
先奉父母嘗於爾時有一田主初種穀時而作願言所  
種之穀要與衆生悉共噉食時鸚鵡子以彼田主先有  
施心常取其穀以供父母田主行穀見有蟲鳥掬音穀  
穗處瞋恚懊惱便設羅網捕得鸚鵡鸚鵡爾時語田主  
言田主先有好心布施故敢來取如何今者而見網捕

田主問言取穀為誰鸚鵡答言有盲父母願以奉之田  
主語言自今以後常於此取勿生疑難畜生尚爾孝養  
父母何況於人佛告比丘昔鸚鵡者今我身是時田主  
者舍利弗是盲父母者今我父母淨飯王摩耶夫人是

由昔孝養今得成佛

法苑  
珠林

鞞提醯國王多足食號曰重興年幼為王諸臣見慢所  
有勅令多不奉行時有天神空中告曰王不須憂於此  
國中有一都處名曰滿財城內有人名曰圓滿當生一

子號為大藥立成之後與王共理臨機制斷無遠不伏  
王果覓得大藥拜為大臣廣設智謨共宣國化乃以女  
聘于大藥為女所諧臨刑得釋遂以女還王請自訪言  
行德義聰慧女人以充家室即辭王去作婆羅門像行  
麥田中見有少女名毗舍佉像容端正歷試多智因尋  
路至妙花城即以為定大藥還白鞞醯城于中路裁書  
與一婆羅門令往妙花城并付金錢四百與毘舍佉婆  
羅門至毘舍佉處授所持書及金錢三百毘舍佉得書

次領金錢惟得三百遂覓足械械使者曰彼寄四百汝  
偷百文使者念曰二俱有智其事難欺便以百錢依數  
還了大藥納毘舍佉為妻重興王念大藥得如是智慧  
之妻求婚半遮羅國王女妙藥半遮羅國議即許諾令  
重興王就彼廣設珍饌所有飲食皆和毒藥時大藥有  
鸚鵡名曰具相善識人情使往彼城觀已還報大藥復  
往半遮羅國訪知彼王珍寶與女妙藥一處同居即便  
強入宮中將妙藥及諸珍寶總率兵衆別路而歸策為

夫人半遮王令使貴書與女妙藥女察知是大藥鸚鵡  
令使報父父覆報女女籠鸚鵡寄父王見鸚鵡倍加瞋  
恚即付屠者鸚鵡願依祖父死法麻纏其尾灌以膏油  
熬火令著任其自死屠者如言鸚鵡飛上虛空奮迅毛  
羽延王室燒盡無遺遂入池中洗沐而去還鞞提醯半  
遮羅王更如女書女即如言復送鸚鵡王令燂毛羽煮  
以沸湯屠者去毛棄之簷外飛鷄下撮取一神祠入神  
背後一小穴中因假神受其供養毛羽漸成搏霄復去

至大藥所重興王報言大藥汝真有福所得眷屬皆悉  
聰明毘舍佉神智過人鸚鵡鳥世所難及

佛言昔迦尸國王名為惡受極作非法苦惱百姓殘賊  
無道四遠賈客珍奇勝物皆稅奪取不酬其直爾時有  
鸚鵡王在於林中聞行路人說王之惡即自思念我雖  
是鳥尚知其非今當詣彼為說善道彼王若聞我語必  
作是言彼鳥之王猶有善言奈何人王為彼譏責倘能  
改修尋即高飛至王園中迴翔下降在一樹上值王夫

人入園遊觀于時鸚鵡鼓翼嚶鳴而語之言王今暴虐無道之甚殘害萬民毒及鳥獸含識嗷嗷人畜憤結呼嗟之音周聞天下夫人苛刻與王無異民之父母豈應如是夫人聞已瞋恚熾盛此何小鳥罵我溢口遣人伺捕爾時鸚鵡不驚不畏入捕者手夫人得之即用與王王語鸚鵡何以罵我鸚鵡答言說王非法乃欲相益不敢罵王時王問言有何非法答言有七事非法能危王身問言何等為七答言一者耽荒女色不敬真正二者

嗜酒醉亂不恤國事三者貪著慕博不修禮敬四者遊  
獵殺生都無慈心五者好出惡言初不善語六者賦役  
誦罰倍加常則七者不以義理劫奪民財有此七事能  
危王身又有三事俱敗王國王復問言何謂三事答言  
一者親近邪佞諂惡之人二者不附賢勝不受善言三  
者好伐他國不養人民此三不除傾敗之期非旦則夕  
夫為王者率土歸仰王當如橋濟渡萬民王當如秤親  
疎皆平王當如道不違聖蹤王者如日普照世間王者



如月與物清涼王如父母恩育慈矜王者如天覆蓋一切王者如地載養萬物王者如火為諸萬民燒除惡患王者如水潤澤四方應如過去轉輪聖王乃以十善道教化衆生王聞其言深自慙愧鸚鵡之言至誠至款我為人王所行無道請遵其教奉以師禮受修正行並以上

下鸚  
鵡

寒臯斷舌使語

寒臯一名鸚鵡也

伯勞守金人不取

收伯勞血以塗金人

不敢取也

萬畢術

鷓鴣不過濟獬渡汶而死

淮南子

宣城太守殷祐有病韓友筮之七月晦日將有大鷓鴣鳥來集廳事上宜勤伺取若獲者為善不獲將成禍祐乃謹為其備至日果有大鷓垂尾九尺來集廳事上掩捕得之祐乃遷石頭督護

晉書

有鷓鴣來巢書所無也師已曰異哉吾聞文武之世童謠有之曰鷓之鴣之公出辱之鷓鴣之羽公在外野往饋之馬鷓鴣跣跣公在乾侯徵褰與襦鷓鴣之巢遠哉

遙遙凋父喪勞宋父以驕鸚鵡鸚鵡往歌來哭童謠有  
是今鸚鵡來巢其將及乎左傳

劉歊居母憂住墓下不出廬足為之屈杖不能起此山  
常有鸚鵡鳥歊在山三年不敢來服釋還家此鳥乃至

南史

以下鷹

八卦生鷹隼之所被六甲出靈龜之所負抱朴子

千雀萬鳩與鷦為讐威勢不敵為鷹所擊焦贛易林

漢武帝時西域獻黑鷹得鵬鷦東方朔識之異類傳

隼鷁也齊人謂之擊征或謂之題肩

詩義疏

楚文王雅好田獵有人獻一鷹曰非王鷹之儔俄而雲際有一物凝翔飄颻鮮白鷹見之使竦然而昇須臾羽墮如雪血灑如雨有大鳥墮地而死度其兩翅廣數十里喙邊有黃衆莫能知時有博物君子曰此鵬鷁也始

飛焉故為鷹所知文王乃厚賞獻者

孔氏志怪

魏黃初元年未央宮中有鷹生燕巢中口爪俱赤至青龍中明帝為凌霄閣始構有鵲巢其上帝以問高堂隆

對曰詩云惟鵲有巢惟鳩居之今興起宮室而鵲來巢

此宮室未成身不得居之象也

搜神記

寶誌生于鷹巢之中

齊後主封鷹凌霄郡君

後主驕縱無度諸濫得富貴者將數萬人鷹犬乃有儀

同之號鬪雞亦號開府

北齊書

大業四年九月徵天下鷹師悉集東京至者萬餘人

北史

隋鷹揚郎將天水姜畧少好畋獵善放鷹犬後遇病見

羣鳥千數皆無頭圍遶略牀叫鳴曰急還我頭來略輒  
頭痛氣絕久蘇因請衆僧急為諸鳥追福許之乃去既

而得愈

法苑珠林

魏公子無忌方食有鳩飛入案下公子使人顧望見一  
鷓在屋上飛去公子乃縱鳩鷓逐而殺之公子暮而不  
食曰鳩避患歸無忌竟為鷓所得吾負之為吾捕得此  
鷓者無忌無所愛於是旁國左右捕得鷓二百餘頭以  
奉公子公子按劍至其籠上曰誰獲罪無忌者耶一鷓

獨低頭不敢仰視乃取殺之

列士傳以下鶴

鶴一名負釜一名背竈一名皂君泥其巢一旁謂之舍

水滿之取魚置池中食其雛若殺其子則一村致災旱

毛詩義疏

鶴俯鳴則陰仰鳴則晴

禽經

鶴雀羣繞旋飛謂之鶴井必有風雨

酉陽雜俎

鶴生三子一為鶴鳩生三子一為鶚

禽經

廣博物志卷四十四

欽定四庫全書

子部  
廣博物志卷四十五

詳校官侍讀學士臣沈咸熙

主事臣祁韻士覆勘

總校官知縣臣楊懋珩

校對官編修臣潘庭筠

謄錄監生臣王曾聞



欽定四庫全書

廣博物志卷四十五

明 董斯張 撰

鳥獸二 鳥下

蒼鳥者賢君修行孝慈於萬姓不好殺生則來

宋書

三足鳥王者慈孝天地則至

白鳥王者宗廟肅敬則至

並上

天地之初有三白鳥主生衆鳥

三五 歷

烏性壽三鹿死後能倒一松三松死能倒一烏

舊說

烏千歲而五色蟾蜍萬歲而丹額

孔子曰存亡禍福皆在已而已天災地妖亦不能殺也

昔者殷王帝辛之時雀生烏於城之隅工人占之曰凡

小以生巨家國必社王名必倍帝辛喜雀之德不治國

家凶暴無極外寇乃至遂亡殷國此逆天之時詭福反

為禍

說苑戰國策作宋玉偃

文王時見蒼烏王者孝悌則至

瑞應圖

赤烏周武王時銜穀至兵不血刃而殷服

宋書

晉文公焚林以求介之推有白鷗遠烟而噪或集之推之側火不能焚晉人嘉之起一高臺名曰思烟臺種仁壽木木似柏而枝長柔軟其花堪食故呂氏春秋云木之美者有仁壽之華烏即此是也或云戒所焚之山數百里居人不得設網羅呼曰仁烏俗亦謂烏白臆者為慈烏則其類也

拾遺記

夫烏何三足陽數奇也是以有虞至孝三足集其庭魯

子鉏瓜三足萃其冠

抱朴子

墨子姓翟名烏其母夢日中赤烏飛入室中光輝照耀

目不能正視驚覺生烏遂名之

琅環記

景帝三年十一月有白頸烏與黑烏羣鬪楚國呂縣白頸不勝墮泗水中死者數千劉向以為近白黑祥也時楚王戊暴逆無道刑辱申公與吳謀反烏羣鬪者師戰之象也白頸者小明小者敗也墮於水者將死水地王戊不悟遂舉兵應吳與漢大戰兵敗而走至于丹徒為

越人所斬墮泗水之效也京房易傳曰逆親親厥妖白  
黑烏鬪于國中燕王旦之謀反也又有一烏一鵠鬪于  
燕宮中池上烏墮池死五行志以為楚燕皆骨肉藩臣  
驕恣而謀不義俱有烏鵠鬪死之祥行同而占合此天  
人之明表也燕陰謀未發獨王自殺于宮故一烏而水  
色者死楚炆陽舉兵軍師大敗于野故烏衆而金色者  
死天道精微之效也京房易傳曰顓征劫殺厥妖烏鵠

鬪

搜神  
記

漢明帝東巡有烏飛鳴乘輿上亭長祝曰烏烏啞啞引  
弓射洞右腋陛下壽萬年臣為二千石射中之帝賜錢

百萬令天下亭壁悉畫焉

後漢書

漢章帝元和元年代郡高柳烏生子三足大如雞色赤

頭有角長寸餘

搜神記

吳順字叔和捷為人性至孝母歿負土成墳有赤烏巢

門甘露降戶

師覺援孝子傳

李陶交趾人母終陶居於墓側躬自治墓不受隣人助

羣鳥銜土即成墳

王韶孝子傳

文讓養母至孝母亡兄弟二人役力葬之日羣鳥數千

銜土壤助而成墳也

蕭廣濟孝子傳

譙郡有功曹嶠天統中濟南來府君出除譙郡功曹清

河崔恕弱冠有令德於人時春夏積旱送別者千餘人

至此嶠上衆渴甚來公有思水之色恕獨見一青鳥於

嶠中乍飛乍止怪而就焉鳥起見一石方五六寸以鞭

撥之清泉湧注盛以銀瓶瓶滿水立竭惟來公與恕供

飲而已議者以為德感所致焉

酉陽雜俎

簡文帝咸安初有烏巢殿屋使人占之曰西南有女人  
師當能伏此怪時歷陽郡烏江寺有尼苦行通靈時號  
聖廢帝即遣召問之對曰修德可以禳災齋戒亦能轉  
禍帝乃建齋七日忽烏運巢而去帝因為聖廢起新林

亭

晉南京  
寺記

海鹽南三里有烏夜村晉何準所居也一夕羣烏啼噪  
準適生女他日復夜啼乃穆帝立準女為后之日

海鹽志



裴俠字嵩和河東人年七歲猶不能言後于洛城見羣

鳥蔽天從西來舉手指而言遂志識聰慧有異常童年

十三遭父憂哀毀有若成人將擇葬地而行空中有人

曰童子何悲葬于桑東封公侯俠懼以告其母母曰神

也吾聞鬼神福善爾家未嘗有惡當以吉祥告汝耳時

俠宅側有大桑林因葬焉

北史

司馬申短毛喜於後主使其廢錮申嘗晝寢於尚書省

下有鳥啄其口流血時論以為譖賢所致

陳書

昔有一極貧人善曉鳥語為賈客貨擔過水邊飯鳥鳴

賈客怖貧人反笑到家賈客問言我在彼飯時聞鳥鳴

我大怖而君反笑何耶答曰鳥向語我賈人身上有好

白珠汝可殺之出珠我欲食其肉是故我笑耳曰汝何

不殺也答曰我坐前世貧人財物故貧為貨擔若復殺

人取物後世受苦何時當已我今寧死不為此事

法苑珠林

昔有鳥名曰拘者遊在叢林樹產孺諸子在於樹上時

有拘者與一獼猴共為親厚時叢樹間有一毒蛇伺行

不在啗拘者子無復遺餘拘者失子悲鳴啼呼不知所  
在熟自思惟知蛇所啗獼猴歸見問之何為答曰蛇啗  
我子了盡無餘獼猴曰我當報之時毒蛇行獼猴前撓  
之蛇怒纏獼猴獼猴捉得頭曳至石上磨破而死棄擲  
而還拘者踊躍畜生尚有報何況於人又雜譬喻經云  
昔有一蛇頭尾自誣頭語尾曰我應為大尾語頭曰我  
應為大頭曰我有耳能聽有目能視有口能食行時在  
前故可為大汝無此術尾曰我令汝去故得去耳我不

去以身繞木三匝三日不已不得求食饑餓垂死頭語  
尾曰汝可放我聽汝為大尾聞其言即時放之復語尾  
曰汝既為大聽汝前行尾在前行未經數步墮大深坑  
而死喻衆生無智強為人我終墮三塗又僧祇律云過  
去世時有一羣雞依榛林住有狸侵食唯餘一雌鳥來  
覆之共生一子子作聲時鳥說偈言此兒非我有野父  
聚落母共合生兒子非鳥復非雞若欲學翁聲復是雞  
所生若欲學母鳴其父復是鳥學鳥似雞鳴學雞似鳥

聲烏雞若兼學是二俱不成此喻道俗雖持禁戒雜染  
不純相中似善口出惡言欲喚是善口復出惡欲喚非

善相復出家

赤鳴烏  
喻經

昔有烏梟共相怨憎烏待晝日知梟無見踰殺羣梟散  
食其肉梟便於夜知烏眼闇復啄羣烏開罩其腹亦復  
散食畏晝畏夜無有竟已有一智烏語衆烏言已為怨  
憎不可求解終相誅滅勢不兩全宜作方便殄覆諸梟  
然後我等可得歡樂若其不爾終為所敗衆烏答言當

作何方得滅讐賊智鳥答言爾等衆鳥拔我毛羽破我

頭我當設計要令殄覆即如其言憔悴形容向臬穴外

而自悲鳴聞其聲已便言今爾何故破傷來至我所鳥

語臬言衆鳥讐我不得生活故來相投以避怨惡時臬

憐愍遂便養給恒與殘肉日月轉久毛羽平復鳥作微

計銜乾樹枝并諸草木著臬穴中似如報恩臬語鳥言

何用是為鳥即答言孔穴之中純是冷石用此草木以

御風寒臬以為爾默然不答而鳥於是即求守孔穴作

給使令用報恩時會暴雪寒風猛盛衆梟率爾來集孔  
中烏得其便尋生歡喜銜牧人火用燒梟孔衆梟一時

於孔焚滅

雜寶藏經

波羅柰國有一烏王其烏名曰蘇弗多羅

隋言善子

而依住

彼波羅柰城與八萬烏和合共住善子烏王有妻名曰

蘇弗舍利

隋言善女

時彼烏妻共彼烏王行欲懷妊時彼烏

妻忽作是念願我得淨香潔飲現今人王之所食者而

彼烏妻思是飲食不能得故宛轉迷悶身體顛顛羸瘦

戰掉不自安故問其妻言汝今何乃宛轉於地身體顛

顛羸瘦戰掉不能自安彼時烏妻報烏王言善哉聖子

我今有娠乃作是念願得清淨香潔餚饌如王食者時

善子烏語其妻言異哉賢者如我今日何處得是香美

飲食王宮深邃不可得到我若入者於彼手邊必失身

命彼妻又復報烏王言聖子今者若不能得如是飲食

我死無疑并其胎子亦必無活善子烏王復告妻言異

哉賢者汝今死日必當欲至乃思如是難得之物善子



烏王作是語已憂愁悵快思惟而住復作是念如我意者如是香潔清淨飲食如主食者實難得也爾時烏王羣衆之內乃有一烏見善子烏心懷愁憂不樂而住見是事已詣烏王所白烏王言異哉聖者何故憂愁思惟而住善子烏王於時廣說前事因緣彼烏復白善子王言善哉聖子莫復愁憂我能為王覓是難得香美餽饈王所食者是時烏王復告彼烏作如是言善哉善友汝若力能為我得辦如此事者我當報汝所作功德爾時

彼鳥從鳥王所居住之處飛騰虛空至梵德王宮去廚  
不遠坐一樹上觀梵德王食厨之內其王食辦有一婦  
女備具餽饈食時將至專以銀器盛彼飲食欲奉與王  
爾時彼鳥從樹飛下在彼婦女頭上而立啄嚙其鼻時  
彼婦女忍其鼻痛即翻此食在於地上爾時彼鳥即取  
其食將與鳥王鳥王得已即將與彼善女鳥妻其妻得  
已尋時飽食身體安隱如是產生爾時彼鳥別日數往  
奪彼食取將與鳥王時梵德王屢見此事作如是念奇

哉竒異云何此烏數數恒來穢汚我食復以鳴爪傷我  
婦女而王不能忍此事故尋時勅喚網捕獵師而語之  
言卿等急速至彼烏處生捕此烏將來其諸獵師聞王  
勅已啟白王言如王所勅不敢違命獵師往至以其羅  
網捕得此烏生捉將來付梵德王時梵德王話其烏言  
汝比何故數汚我食復以鳴爪傷我婦女爾時彼烏語  
梵德王善哉大王聽我向王說如此事令王歡喜時梵  
德王心生喜悅作如是念希有斯事云何此烏能作人

語作是念已告彼烏言善哉善哉汝必為我說斯事意  
令我歡喜爾時彼烏即以偈頌向梵德王而說之曰大  
王當知波羅奈有一烏王恒依止八萬烏衆所圍遶悉  
皆聽彼王處分彼烏王妻有所憶我向大王說其緣烏  
妻所思香美饌如是大王所食者是故我今數數來抄  
撥大王香美食今者為彼烏王故致被大王之所繫善  
哉惟願大聖王慈悲憐愍放脫身我為烏王彼妻故數  
來抄撥大王食我念從此一生來未嘗經造如此事今

為大王一勅已於後不敢更復為時梵德王既聞彼鳥  
如此語已心生喜悅作如是言希有此事人尚不能於  
其主邊有如是等愛重之心如此鳥也作是語已其梵  
德王而說偈言若有如是大臣者彼應重答食封祿須  
似如是猛健鳥為主求食不惜命其梵德王說此偈已  
復告鳥言善哉汝鳥於今已去常來至此取香美食若  
其有人遮斷於汝不與食者來語我知我自與汝已分

所食而將去耳

法苑珠林  
以下鵲

鵲巢知風之所起，獺穴知水之高下，暉日知晏陰，諧知

雨

淮南子

鵲夜傳枝，月暈繞鸞，皆主有赦。

有鵲銜火於清溪之上，鵲化成龍。

述異記

常山張顥為梁相，天新雨後有鳥如鵲飛，翔稍下墜地，民爭取化為一圓石，顥椎破之，得金印，文曰忠孝侯印。顥表上閩藏之秘府，顥漢靈帝時至太尉。

幽明錄

楊宣為河內太守，行縣有羣鵲鳴桑樹上，宣曰：前有覆

車粟此鵲相隨欲往食行數里果有覆車粟

並部者  
舊傳

安德令劉長仁聞輅曉鳥鳴初不信之須臾有鳴鵲來  
閣屋上聲甚急輅曰鵲言東北有婦昨殺夫日在虞淵  
之際告者至矣到時果有東北同伍民來告如輅言長

仁乃服

魏志

慧約靜漠自娛禪誦為樂天監十八年己亥四月八日  
天子發弘誓心受菩薩戒乃幸等覺殿皇儲已下爰至  
道俗士庶咸希度脫弟子著錄者凡四萬八千人嘗受

戒時有一乾鵠歷陛而昇狀若聽受至說戒畢然後飛騰又嘗述戒有二孔雀驅斥去勅乃聽上徐行至壇俛頸聽法上曰此鳥必欲滅度別受餘果矜其至誠更為說法無何二鳥同化

高僧傳以下燕

朱鳥燕也鷓鴣子規也擊穀布谷也

廣雅

千歲燕其巢戶北向其色多白而尾掘取陰乾末服一

頭五百歲

抱朴子

山見白燕其君且得貴女

京房易傳



東海有鳥焉其名曰意怠其為鳥也跔跔蹠蹠而似無能引援而飛迫脇而棲外人卒不能害

莊子

少皞之時赤燕一雙飛集少皞之戶遺其丹書

田俅子

周穆王迎意而子居靈卑之宮訪以至道後欲以為司徒意而子愀然不悅化作玄鳥飛入雲中故後人呼玄

鳥為意而

琅環記

魏禪晉之歲北闕下有白光如鳥雀之狀時飛翔來去有司聞奏帝所羅之得一白燕以為神物於是以金為

樊置於宮中旬日不知所在論者云金德之瑞昔師曠時有白燕來巢檢瑞應圖果如所論白色叶於金德師曠晉時人也古今之義相符焉

拾遺記

魏景初元年有燕生巨鷲於衛國李蓋家形若鷹吻似燕高堂隆曰此魏室之大異宜防鷹揚之臣於蕭牆之內其後宣帝起誅曹爽遂有魏室

搜神記

五雀六燕飛集衡衡適平一雀一燕飛而易處則雀重

而燕輕

九章算術

侍中紀昌睦初生有白燕一雙出屋既表素質宦途亦

通

宣城記

安清字世高安息國王太子也漢桓帝時人聰敏博學

鳥獸之聲無不綜達常行見羣燕忽謂伴曰燕云應有

送食者頃之果有致焉衆咸竒之

高僧傳以下雀

雀一名嘉賓鵲一名神女雞一名燭夜

古今注

白雀者王者爵祿均則至

宋書

赤雀不見則國無賢白雀不見則無後嗣

遁甲圖

僊家次藥有昆丘神雀

漢武內傳

千歲之雉入海為蜃百年之雀入江為蛤千歲之龜能  
與人語千歲之狐起為美女千歲之蛇斷而復續千歲  
之鼠而能相卜

搜神記序

雀夕鷖鴟晝盲

黃帝將起有黃雀赤頭立白日旁帝占曰黃者土精赤

者火精雀者當崩余當立

春秋考異郵

季秋赤雀銜丹書入鄴止於昌戶昌拜稽首受

尚書中候

景公探雀鷩鷩弱反之晏子聞之入見景公曰君何為者也公曰吾探雀鷩鷩弱故反之晏子逡巡北面再拜而賀曰吾君有聖王之道矣吾君仁愛曾鳥獸之加焉而況於人乎此聖王之道也

晏子

孔子見羅者其所得者皆黃口也孔子曰黃口盡得大爵獨不得何也羅者對曰黃口從大爵者不得大爵從黃口者可得孔子顧謂弟子曰君子慎所從

新序

世傳公治長能通鳥語或言治長貧而閑居無以給食

有雀飛鳴其舍呼之曰南山有虎駝羊當急取之治長如其言往山中果得大羊及亡羊者跡之索得其角以為偷訟之魯君繫之獄孔子為之白於魯君不解未幾雀復鳴於獄舍曰齊人侵疆當急禦之獄吏白於魯君弗信姑如其言跡之齊師果至命治長發兵奮敵獲勝因釋之欲爵以大夫治長不受蓋恥因禽獸以得爵祿也後世遂廢其學

圉人魏尚高帝時為太史有罪繫詔獄有萬頭雀集獄

棘樹上拊翼而鳴尚占曰雀者爵命之祥其鳴即復也  
我其復官也有頃詔還故官

陳留者  
舊傳

漢武祠甘時有神雀下羣臣皆上壽東方朔獨不賀帝  
曰朔何不賀曰此所謂巫雀非神雀也或有巫者為國

作害卒有巫蠱之事果應

東方朔  
別傳

漢綏和二年三月天水平襄有鷦生雀哺食至大俱飛  
去京房易傳曰賊臣在國厥咎鷦生雄雀又曰生非其

類子不嗣也

搜神  
記

顯宗時有神雀集宮殿冠羽有五采色帝召賈逵問之對曰昔武王終父之業鸞鷲在岐宣帝威懷戎狄神雀仍集此胡降之徵也

後漢書

漢中平三年八月懷陵上有萬餘雀先極悲鳴已因亂鬪相殺皆斷頭懸著樹枝枳棘到六年靈帝崩夫陵者高大之象也雀者爵也天誠若曰懷爵祿而尊厚者自還相害至滅亡也

搜神記

瑯琊董种為不其令亦雀乳廳前桑上民為作歌頌

後漢



書

任城魏肇之初生有雀飛入其手占者以為封爵之祥

異苑

成武丁邲人能達鳥鳴為郡主簿與衆人俱坐聞雀鳴而笑曰東市輦粟車覆雀相呼往食之衆人遣視信然

桂陽先

賢讚

班超為西域都護獻大雀詔大家作頌

曹大家集

漢末有白雀之瑞周不疑已作頌曹公忽授紙筆立令

復作既成操大奇之

先賢傳

孫皓嘗問鳥之大者惟鶴小者惟雀乎張尚對曰大者

有禿鶩小者有鷓鴣

吳書

王祥後母病欲黃雀炙乃有黃雀數枚飛入其幙因以

供母

孝子傳

晉元帝未登極有三雀共登一雄鷄背三入安東府廳

事占者云當三進爵為天子也

洞林

侯瑾字子瑜解鳥語常出門見白雀與翠雀同行慨然

嘆曰今天下大亂君子小人相與焉

燉煌  
實錄

沛國有一士人姓周同生三子年將弱冠皆有聲無言  
忽有一客從門過因乞飲聞其兒聲問之曰此是何聲  
答曰是僕之子皆不能言客曰君可還內省過何以致  
此主人異其言知非常人良久出云都不憶有罪過客  
曰試更思幼時事入內食頃出語客曰記小兒時當牀  
上有燕巢中有三子其母從外得食哺三子皆出口受  
之積日如此試以指內巢中燕雛亦出口承受因取三

藹茨各與食之既而皆死母還不見子悲鳴而去昔有此事今實悔之客聞言遂變為道人之容曰君既自知悔罪今除矣言訖便聞其子言語周出忽不見此道人

搜神

記

宋程德度武昌人為衛軍臨川王行參軍時在潯陽屋有鷺巢夜間屋裏忽然自明有一小兒從窠而出長可丈餘潔淨分明至度床前曰君却後二年當得長生之道儵然而滅度甚祕異之元嘉十七年隨王鎮廣陵過

禪師釋道恭因就學禪甚有解分到十九年春其家武昌空齋忽有殊香芬馥達于衢路闔境往觀三日乃滅

冥祥

記

孫氏妻黃見一童子當前以釵擲之躍入雲中夜聞戶

外歌曰昔填夏家塚輦泥頭欲禿今寄黃氏居非意傷

我目尋覓巢中得一白燕左目傷

續異記

高士馬樞日常黃能視閻中物有白燕一雙巢其庭樹

馴狎欄無時上几案春來秋去幾三十年

陳書

竇如同從河洲來得一青鳥馴養愛翫舉族呼之為鷓  
吾曰鷓出上黨數曾見之色並黃黑無駁雜也故陳思  
王鷓賦云揚玄黃之勁羽試檢說文鴝雀似鷓而青出  
羌中韻集音分此疑頓釋

顏氏家訓

乃往昔時有一小兒持弓箭入神樹中戲邊有三人亦  
在中看樹上有雀小兒欲射三人勸言若能中雀世間  
健兒小兒意美引弓射之中雀即死三人共笑助之歡  
喜而各自去經歷生死數劫之中所在相會受罪

法苑珠林

一鸛雀口中銜草語諸鳥言我等共相憐愍集會一處而共住止爾時諸鳥皆信其言而來聚集時此鸛雀趣鳥飛後就他巢窠啄卵而食上

昔者菩薩為孔雀王從妻五百棄其舊匹欲娶青雀為妻其青雀唯食甘露好果孔雀為妻日行取之其國王夫人有疾夢覩孔雀云其肉可為藥寤已啟聞王令獵士疾行索之夫人曰有能得之者媵以季女賜金千斤國諸獵士分布行索覩孔雀王從一青雀在常食處即

以蜜麩每處塗樹孔雀輒取以供其妻射師以蜜麩塗身踞坐而候孔雀取麩人應手獲之焉孔雀曰子之勤身必為利也吾示子金山可為無盡之寶子厚吾命矣獵者又曰大王賜吾千觔金妻以季女豈信汝言乎剋以送獻汝矣孔雀見王曰大王懷仁潤無不周願納微言乞得少水吾以慈咒服之疾瘳矣若其無效受罪不晚王順其意夫人服之衆疾皆瘳華色煒曄宮人皆然舉國歎王弘慈全孔雀之命獲延一國之壽孔雀曰願



得投身于彼大湖并咒其水率土黎民衆疾可瘳若有  
疑妄願以杖捶吾足王曰許可孔雀如之國人飲水並  
皆行力聾聽盲視瘖語蹙伸衆疾皆然夫人疾除國人  
並得無病兼無害孔雀之心孔雀具知向王陳曰受王  
生潤之恩吾報濟一國之命報畢乞退王曰可爾雀即  
翔飛升樹重曰天下有三癡王曰何謂三耶一者吾癡  
二者獵士癡三者大王癡王曰願釋之也雀曰諸佛重  
戒以色為火燒身危命貪色之由也吾捨五百供養之

妻而貪青雀索食供之有如僕使為狂網所得殆危身  
命斯吾癡也獵者之癡吾至誠之言捨一山之金棄無  
窮之寶信夫人邪偽之欺望季女之妻覩世狂愚皆斯  
類矣損佛真誠之戒信鬼魅之欺酒藥淫亂或度破門  
之禍或死入太山其苦無數思還為人猶無羽之鳥欲  
飛升天豈不難哉媼婦之妖蠱喻彼魑魅靡不由之亡  
國危身而愚夫尊之萬言無一誠也而射師信之斯謂  
獵者愚矣王得天醫除一國疾諸毒都滅顏如盛華巨

細欣賴而王放之王始欲殺吾以肉療夫人疾斯謂王  
愚矣佛告舍利弗孔雀王者自是之後周旋八方輒以  
神藥慈心布施愈衆生

法苑珠林

昔者菩薩身為雀王慈心濟衆由獲身瘡有虎食獸骨  
挂其齒困饑將終雀王入口啄骨日日若茲雀口生瘡  
身為瘦疵骨出虎活雀飛登樹說佛經曰殺為凶虐其  
惡莫大虎聞雀誠勅聲勃然恚曰爾始離吾口而敢多  
言雀覩其不可化退速飛去佛言雀王者是吾身虎者

是調達身

雀王經以下雉

西方曰鷩雉攻木之工也東方曰鷩雉埴埴之工也南方曰翟雉攻金之工也北方曰鷮雉攻皮之工也伊洛而南曰翬雉設五色之工也

賈逵左傳注

昔平公時有鳥從南方來赤質五色皆備集於庭叔向曰吾聞師曠言西方有鳥白質五色曰翬南方有鳥赤質五色曰雉今來為君瑞也

瑣語

魯昭公時雉銜環入

雉之為言弟也喻昭公弟為季氏入之為君也

春秋感精符

平原太守劉邠字令清取印囊及山鷄毛置器中使輅  
筮之輅曰內方外圓五色成文含寶守信出則有章此  
印囊也高嶽巖巖有鳥朱身羽翼玄黃鳴不失晨此山  
鷄毛也邠曰此郡官舍連有變怪使人恐怖其理何由  
輅曰或因漢末之亂兵馬擾攘軍尸流血污染丘山故  
因昏夕多有怪形也明府道德高妙自天祐之願安百  
姓以光休寵

異苑

高平郝超字嘉賓年二十餘得重病廬江杜不愆少就

外祖郭璞學易卜頗有經驗超令試占之卦成不愆曰

案卦言之卿所恙尋愈然宜于東北三十里上官姓家

索其所養雄雉籠而絆之置東簷下却後九日景午日

午時必當有野雌雉飛來與交合既畢雙飛去若如此

不出二十日病都除又是休應年將八十位極人臣若

但雌逝雄留者病一周方差年半八十名位亦失超時

正羸篤慮命在旦夕笑而答曰若保八十之半便有餘

矣一周病差何足為淹然未之信或勸依其言索雉果

得至景午日超卧南軒之下觀之至日晏果有雌雉飛入籠與雄雉交而去雄雉不動超歎息曰管郭之奇何以尚此超病逾年乃起至四十卒於中書郎

搜神記

孫休好射雉至其時則晨去夕反羣臣諫曰此為小事何足甚耽休曰雖為小物耿介過人所以好之

吳志

釋僧安戒業精苦坐禪講解時號多能齊文宣時在王屋山衆徒二十許人講涅槃始發題有雌雉來座側伏聽僧若食時出外飲啄日晚上講依時赴集三卷未了

遂絕不至衆咸怪之安曰雉今生人道不須怪也武平

四年安領徒衆至越州行頭陀忽云往年雉應生此

逕至一家遙喚雉一女走出如舊相識禮拜歡喜女

父母異之引入設食安曰此女何故名雉雉耶答曰見

其初生髮如雉毛既是女故名雉雉也安大笑為述本

緣女聞涕泣苦求出家二親欣然喜之為講涅槃便領

解一無遺漏至後三卷茫然不解

高僧傳

薛安祖天熱舍樹下有鷲鳥逐雉雉急投之遂觸樹而



死安祖取至陰地徐徐護視良久得蘇放去後夜忽夢  
一丈夫衣冠甚偉著繡衣曲領再拜安祖問之曰感君  
前日見放故來謝德

異苑

朱文繡與羅子鍾為友俱仕於梁繡既死鍾哭之其夜  
俱亡梁南七里有鷄山葬繡於其中北九里有雉澗埋  
鍾於其內繡神靈變為鷄鍾魂化為雉清鳴哀響來  
往不絕故詩曰鷄山別飛響雉澗和清音

異苑

渤海王高歡攻鄴時瑞物無歲不有令史焚連理木煮

白雉而食之

三國  
典畧

佛言於過去世雪山之側有山鷄王多將鷄衆而隨從之鷄冠極赤身體甚白語諸鷄言汝等遠離城邑聚落莫與人民之所噉食我等多諸怨嫉好自慎護時聚落中有一猫子聞彼有鷄便往趣之在於樹下徐行低視而語鷄言我為汝婦汝為我夫而汝身形端正可愛頭上冠赤身體俱白我相承事安隱快樂鷄說偈言猫子黃眼愚小物觸事懷害欲噉食不見有畜如此婦而得

壽命安隱者

雜寶藏經以下鳩

尸鳩

按爾雅即布穀非戴勝也或云鷓鴣皆失之也

燕之東北朝鮮冽水之間

謂之鷓鴣

福丕兩音

自關而東謂之戴鷓鴣東齊海岱之間謂

之戴南南猶鷓也

此亦語聲之轉也

或謂之鷓鴣

按爾雅說戴鷓鴣下鷓鴣自

別一鳥名方言似依此義又失也

或謂之戴鷓鴣或謂之戴勝東齊吳揚

之間謂之鷓鴣自關而西謂之服鷓鴣或謂之鷓鴣燕之東

北朝鮮冽水之間謂之鷓鴣

方言

鳩自關而東周鄭之郊韓魏之都謂之鷓鴣

音郎

布穀自關東西梁楚之間謂之擊穀自關而西或謂之

布穀

今江東呼為  
覆穀 並上

舜耕於歷山思慕父母見鳩與母俱飛鳴相哺食益以

感思乃作歌

琴操

高帝之敗遁叢薄中時有鳩鳴其上追者不疑遂得脫

即位後作鳩杖賜老人

風俗通

皮延字叔然會稽山陰人養母至孝居喪有白鳩巢廬

側

會稽  
典錄

楊由見社中水鳩鬪知有兵賊象不赴酒食

後漢書

晉永康元年正月大會有鳩入御坐武帳中拂司空張

華之冠

蕭方等三十國春秋以下鷓

晉王敦將圖不軌詢諸郭璞璞曰公若起事必不久敦大怒曰我輩不久卿壽幾何璞曰我命盡在今日午時死在緋衣人手敦曰我令青衣人戮汝既戮之青衣人乃裴姓敦方恚時許旌陽以酒杯擲于梁化為鷓

後魏崔光未嘗恚怒位司徒晝坐讀經鷓飛集膝前入

懷中緣臂上久之乃去

舍利弗雖復聰明然非一切智於佛智中譬如嬰兒如  
阿婆檀那經中佛在祇洹住晡時經行舍利弗從佛經  
行是時有鷹逐鴿鴿飛來佛邊住佛經行過之影覆鴿  
上鴿身安隱怖畏即除不復作聲後舍利弗影到鴿便  
作聲戰怖如初舍利弗白佛言佛及我身俱無三毒以  
何因緣佛影覆鴿鴿便無聲不復恐怖我影覆上鴿便  
作聲戰慄如故佛言汝三毒習氣未盡以是故汝影覆

時恐怖不除佛語舍利弗汝觀此鵠宿世因緣幾世作  
鵠舍利弗即時入宿命智三昧觀見此鵠從鵠中來乃  
至八萬大劫常作鵠身過是已往不能復見舍利弗從  
三昧起白佛言是鵠八萬大劫中常作鵠身過是已前  
不能復知佛言汝若不能盡知過去世試觀未來世此  
鵠何時當脫舍利弗即入三昧觀見乃至八萬大劫亦  
未免鵠身過是已往不復能知不審此鵠何時當脫

智度

論以  
下鷺

鷺水鳥也齊魯之間謂之春鋤

詩義疏

朱弋不攫肉朱鷺不吞鯉

禽經

錢塘人姓杜船行時大雪日暮有女子素衣來岸上杜曰何不入船遂相調戲杜欣然載之後成白鷺飛去杜

惡之便病死

搜神記

煬帝征遼回次于柳城郡之望海鎮步出觀望有大鳥二素羽丹喙狀同鶴鷺出自霄漢翱翔雙下徘徊馴擾翔舞御營敕著作佐郎虞綽製瑞鳥銘以進上命鑄於



其所仍勅殿內丞閻昆圖寫其狀

大業拾遺  
以下鳥

野鳧甚小而好沒水中者南楚之外謂之鷺鷥

鷺音指  
辟反鷥

音他

大者謂之鷺鷥

滑蹄兩音

奚反

方言

或云姪欲情欲受鷺身或云愚癡多故亦受鷺身問此  
二鷺身為同為異答謂習欲生者是水鳥鳧鷥之流習  
癡生者是陸鳥鷺鷥之類者或晝見夜亦見由欲生故  
恒多連飛並泛鳥之類者或夜見晝不見由癡生故恒  
多夜遊伺鼠鴟亦二種習欲生者是老鷗則晝見夜不

見習癡生者是角鴟則夜見晝不見

智度論

化蒙縣祠山上有池池中有松鳧如今野鳧棲息松間

故俗謂之松鳧

南越志

吳郡魚城城下水中有石首魚至秋化為鳧鳧頂中尚有石

張湯欲以鶩當鳧祀宗廟董仲舒曰鶩非鳧鳧非鶩愚

以為不可

春秋繁露以下鶩

吳景帝有疾求覲視者得一人景帝欲試之乃殺鶩而

埋於苑中架小屋施牀几以婦人屐履服物著其上乃

使覘視之告曰若能說此塚中鬼婦人形狀者當加賞

而即信矣竟日盡夕無言帝推問之急乃曰實不見有

鬼但見一頭白鷺立墓上所以不即白之疑是鬼神變

化作此相當候其真形而定無復移易不知何故不敢

不以實上聞景帝乃厚賜之然則鷺死亦有鬼

抱朴子

孝懷帝永嘉元年二月洛陽東北步廣里地陷有蒼白

二色鷺出蒼者飛翔冲天白者止焉陳留董養曰步廣

周之狄泉盟會地也白者金色國之行也蒼為胡象其  
可盡言乎是後劉元海石勒相繼亂華

晉書

義熙中羌主姚畧壞洛陽溝取磚得一雙雄鷲並金色

交頸長鳴聲聞九臯養之此溝

幽明錄

濟南郡張公城西北有鷲溝南燕世有漁人居水側常  
聽鷲聲而衆鷲中有鈴聲甚清亮候之見一鷲咽頸極  
長因羅得之項上銅鈴綴以銀鑠有隱起元鼎元年字

酉陽  
雜俎

高祖圍廣固夜忽有烏大如鷲蒼黑色飛入高祖帳中  
胡蕃起賀曰蒼黑胡虜之色胡虜歸我大吉之祥也明

旦攻城陷之

宋書

傅承為江夏守有一雙鷲失之三年忽引道得三十餘

頭來向承家

異苑

淨影寺沙門慧遠初在鄉養一鷲恒隨遠聽經及遠入  
京留在寺鷲晝夜鳴噪不止僧徒送入京至寺門放之  
自然知遠房入馴狎每聞講經入室伏聽若聞泛說他

事則鳴翔而出如是六年忽哀叫庭宇不肯入堂至二

旬而遠卒

高僧傳

昔太玄中章安郡史悝有駁雄鷺善鳴悝女常養之鷺非女不食苟儉苦求得之鷺輒不食乃以還悝又數日晨起失女及鷺隣家聞鷺向西追至一水唯見女衣及

鷺毛在水邊今名此水為鷺女溪

廣古今五行記

一比丘乞食至珠師門為王穿大牟尼珠師放珠入取食以施有鷺見珠映比丘衣作赤色其狀似肉即吞之

珠師出覓珠不得驚問比丘得我珠耶比丘恐彼殺鷲  
取珠不敢以告被加以絞縛耳眼口鼻盡皆血出是時  
彼鷲來趣食血珠師嗔憤打鷲即死比丘見鷲既死涕  
泣不樂珠師問故比丘具說上因珠師即剖鷲得珠乃  
號哭懺悔

佛言乃往過去時有蓮華池多有水鳥在中而住時有  
鸛雀在於池中徐步舉腳諸鳥皆言此鳥善行威儀徐  
序不惱水性時有白鷲而說偈言舉脚而徐步音聲極

柔輒欺誑於世間誰不知諂讒鸛雀語言何為作此語  
來共作親善白鶩答言我知汝諂讒終不親善汝欲知  
爾時鶩者即我身是也爾時鸛雀者今提婆達多是也

雜寶藏經

以下鳥

水戰之鳥何必白纓盈俎之雞何必長鳴

蔡氏化清經

西門外鳥城者吳王築此城以養鳥

吳地記

桓邈為汝南郡人齋四鳥鳥作禮大兒夢四鳥衣人請  
命覺忽見鳥將殺遂救之買肉以代還夢四人來謝而



去夢

憶在江都時陽華李姑畜鬪鼻水池上苦獺嚙鼻時下

朱里芮姥者求捕獺狸獻姥謂姑曰是狸不他食當飯

以鼻姑怒絞其狸今夷術真似此也

趙后外傳樊  
嬖對飛燕語

陸遜字伯言時建昌侯慮於堂前作鬪鼻欄頗施小巧

遜乃正色曰君侯宜覽經典用此何為慮即便毀撤之

南史

晉周昉少時與商人沂江俱行夕止宮亭廟下同侶相

語誰能入廟中宿昉性膽果決因上廟宿竟夕晏然晨起廟中有白頭老翁昉遂擒之化為雄鬲昉捉還船欲烹之因而飛去後竟無他

述異記

智曠年將不惑始蒙剃落進戒以後頭陀蛇弭床側每夕山隅四燈同照士俗雲赴奄成華寺有一宰鬲而為齋者鬲神夜告便曰何有殺牲而充淨供自爾便斷

僧神

傳

元嘉中章安有人噉鬲肉乃成痲病胸滿面赤不得飲

食醫令服秫米瀋須臾煩悶吐一臯雛

異苑

僧羣年一百三十忽見一折翅臯當梁頭羣將舉錫撥之恐有轉傷因此回歸遂絕水數日而終臨終謂左右

曰我少時曾折一臯翅驗此以為報也

神僧傳以下鷄

鷄陳楚宋魏之間謂之鷺鷥

避祇兩音

桂林之中謂之割鷄

或曰儼

音從

北燕朝鮮冽水之間謂伏鷄曰抱

房與反江東呼甚史

富爵子及鷄雛皆謂之鷺

恪遯反關西曰鷺音顧

其卵伏而未孚

始化謂之涅

方言

陽溝巨鷄古之名鷄

爾雅注

鷄屬辟雉鷄也杜艾季蜀

廣雅

鄙諺有之黃鷄生卵烏鷄伏之但知其為烏鷄之子不

知其為黃鷄之兒小可以喻大

晉表喬妻于氏上表論養子議

失晨之雞思補更鳴

三國志

賢者居明夷之世為時所傷或衆邪在位厥妖雞生角

京房易傳

羊溝之鷄三歲為株相者視之則非良鷄也然而時勝

人者以狸膏塗其頭也

注羊溝鬪鷄處抹魁帥也鷄畏狸膏莊子

鷄人

鷄屬木故列職于春官

掌共鷄牲辨其物大祭祀夜嘒旦以

詔百官凡國之大賓客會同軍旅喪紀亦如之凡國事

為期

所作謂之事期謂作事之時

則告之時

告其時

凡祭祀面禳釁

面

面也禳以却祀灾釁以厭妖怪

共其鷄牲

周禮

扶桑山有玉鷄玉鷄鳴則金鷄鳴金鷄鳴則石鷄鳴石

鷄鳴則天下之鷄悉鳴而潮水應之矣

神異經

龍鄉有伺晨鷄獻之考驗而與漏合

文選注

狼盲之鷄特稟異聲

狼盲地名  
天中記

高興縣多容鷄其形似鷄而五采至則年穰

南越志

移風縣有潮鷄鳴長且清如吹角每潮至則鳴一名林

鷄

輿地志

婁門外鷄陂墟故吳王所畜鷄使李保養之去縣二十

里

越絕書

江表傳曰南郡獻長鳴承露鷄南越志曰鷄冠四開如

蓮花鳴聲清徹也

陳倉山上有石雞與山雞各別趙高使火燒山山雞飛去石雞不去晨鳴山頭聲聞三十里或云是玉雞

陳倉城上有神鷄人取不得雄者王雌者霸穆公得雌

故霸

辛氏三秦記

漢昭靈后名舍始遊浴池有玉鷄銜赤珠出刻曰玉英吞此者王舍始吞之生高祖

祝鷄翁者洛人也居尸鄉北山下養鷄百餘年鷄有千餘頭皆立名字暮棲樹上晝放散之欲引呼名即隨呼

而至賣鷄及子得千餘萬輒置錢去之吳作養魚池後  
升吳山白鶴孔雀數百常止其傍云

列仙傳

漢宣帝黃龍元年未央殿輅軫中雌鷄化為雄毛衣變  
化而不鳴不將無距元帝初元元年丞相府史家雌鷄  
伏子漸化為雄冠距鳴將至水光中有獻雄鷄生角者  
五行志以為王氏之應京房易傳曰賢者居明夷之世  
知時而傷或衆在位厥妖鷄生角又曰婦人專政國不

靜北鷄雄鳴主不榮

搜神記



孝武帝太元末京口謠曰黃雌鷄莫作雄父啼一旦去  
毛衣衣被拉颯棲尋而王恭起兵誅王國寶旋為劉牢  
之所敗故言拉颯棲也

晉書

殷浩以江道為長史及丁令反叛浩令道代之乃取數  
百鷄以長繩連之脚皆繫火一時驅放羣鷄駭散飛過  
塹集賊營皆燃因其驚亂縱兵擊之

晉中興書

涼州罪人於市將刑忽有一白雄鷄飛於人邊請命引  
頸長鳴伏地向吏驅之去輒來刺史張義免其坐

西河記

支遁常與其師辨論物類謂鷄卵生用未足殺之與諸  
蜎動不得同罰師尋亡忽見形來至遁前手執鷄卵投  
地破之見有雞雛出殼而行遁即惟悟悔其本言俄而  
師及雞雛並滅不見

冥祥記

竺法慧語弟子法昭曰汝過去時折一雞脚其殃尋至  
俄而昭為人所擲脚遂永疾

卞伯玉作東陽郡竈正熾火有雞遙從口入良久乃沖  
突而出毛羽不焦鳴啄如故伯玉尋病殞

異苑

崔光字長仁正始元年夏有典事史元顯獻四足四翼  
雞詔趙邕以問光光對曰翅足衆多羣下相扇動之象  
雛而未大脚羽差小其勢尚微易制御也帝大悅後數  
日茹皓等並以罪伏法於是禮光逾重

後魏書

維神雀元年歲在辛酉八月己酉朔十三日丁酉帝顓  
頊遣征西大將軍下雉公王鳳西中郎將白門侯扁鵲  
咨爾凌鷄山子維君天姿英茂乘機晨鳴雖風雨之如  
晦抗不已之竒聲今以君為使持節金西蠻校尉西河

太守以揚州之會稽封君為會稽公以前浚鷄山子為  
湯沐邑君其祗承予命使西海之水如帶浚鷄之山如  
礪國以永存爰及苗裔浚山侍郎丁鴻舍人鳧亭男梁  
鴻郎中蘇鵠死罪伏惟君德著朝野勲加鷄鶩故天王  
鳳皇持錫位封令鳳鵠等在柏外願時拜受不勝欣豫  
之情謹詣樓下以聞

宋袁淑排詰  
記鷄九錫文

魏文帝遣使求長鳴短鳴鷄羣臣以非禮欲不與孫權

勅付之

吳錄

扶南王范尋以鐵為鬪鷄假距與諸將賭戲

兵時外國傳

雩都縣江邊有石室常有神鷄色如金出穴奮翼長鳴

見人輒飛入穴因號為金鷄穴

述異記以下鷓臯

鴝鷓江東呼為鈎鴝即怪鴝是也一名角鴝一名訓狐

爾雅

注

自關而西謂臯為流離

注疏

蚍蜉甘帶鴝臯者鼠

莊子

胡桃之券令雞夜鳴甌瓦之契投臯自止

張華感應類從志

太山之鴟喙腐鼠於窮澤非有害於人也今有司盜主

財而食之焉得若太山之鴟乎

鹽鐵論

臬逢鳩鳩曰子將安之臬曰我將東徙鳩曰何故臬曰

鄉人皆惡我鳴以故東徙鳩曰子能更鳴可矣不能更

鳴東徙猶惡子之聲

說苑

子產治鄭蒺藜不生鴟鴞不至

梁冀別傳

道西有道兒君碑是魯相陳君立昔曾參居此臬不入

郭水經

注

季仲甫夜卧牀上或為鴟鳥後至沓縣巨山山上有羅鷹者羅得鴟視之仲甫也

列仙傳

涼州張重華遣謝艾代麻狄引師出振武夜有二梟鳴于牙中艾曰梟者邀也六博得梟者勝今梟鳴牙中克敵之兆果大破之

異苑

梁武太清三年侯景圍臺城遠不通問簡文作紙鳶飛空告急於外侯景謀臣王偉謂景曰此紙鳶所至即以事達外令左右善射者射之及墮皆化為鳥飛入雲中

不知所往

獨異志  
以下雜鳥

李元忠性甚工彈彈桐葉常出一孔擲棗栗而彈之中七八常從文襄入謁魏帝有梟鳴殿上文襄命元忠彈之間得幾丸而落對曰一九奉至尊威靈一九承大將軍意氣兩丸足矣如其言而落之

北史

金得伯勞之血則昏鐵得鷲鷄之膏則瑩石得鵲髓則化銀得雉糞則枯翡翠粉金蟹敗漆人氣破犀

驪黃自關而東謂之鶻鶻

又名商庚

自關而西謂之驪黃

其色



鵲黑而黃  
因名之

或謂之黃鳥或謂之楚雀

方言

毛詩義疏云齊人謂之搏香

桑飛

即鷓鴣也又名鷓鴣

自關而東謂之工雀或謂之過羸或謂

之女鷗

今亦名為巧嬾江東呼布母

自關而東謂之鷓鴣自關而西

謂之桑飛或謂之慳爵

言慳截也

鶉鳴

鳥似鷄五色冬無毛赤

周魏齊宋楚之間謂之定

甲或謂之獨春

好自低仰

自關而東謂之城旦

言其辛苦有似於罪禍者

謂之倒懸

好自懸於樹也

或謂之鳴鳴自關而西秦隴之內謂

之鷓鴣

鷓鴣音其鴝鳩謂之鷓鴣自關而西秦漢之間謂之鷓鴣

其大者謂之鴝音鳩其小者謂之鷓鴣或謂之鷓鴣音

葵

或謂之鴝音鳩音或謂之鷓鴣梁宋之間謂之鷓鴣並

上

鷓鴣謂之連錢毛詩

義疏

鷓鴣一名內史一名花豸採蘭

雜志

鷓鴣一名墮羿形似鵲人射之則銜矢反射人

思婦鳥名也

顧渚山有報春鳥春至則鳴秋分亦鳴似鷓鴣之類也

述異記

鶉鴝飲水數斗而不足鰾鮪入口若露而死

杜鵑相推而鳴先鳴者吐血死常有入山行見一羣寂然聊學其聲即死初聽其聲者主離別

扶老禿秋也狀如鶴而大大者頭高八尺善與人鬪好啖蛇

江充之害其萌反舌鳥入殿

春秋保乾曜

啄木本雷公採藥吏化為此鳥

古今異傳

鸚鵡水鳥黃喙長尺餘南人以為酒器

並都記

鳩鵲一名剖葦青斑長尾江東呼為蘆虎似雀

埤雅

雪姑冬月羣飛鳴則必雪

會稽縣志

四足之美有庶二足之美有鷓

詩正義

海扇見乎上已鷓鷯于孟冬

鳩鳥一名雲白抱朴子云渴者恣口於雲白之酒饑人之取飽於鬱肉漏脯也

鳩一名曇鳥亦曰同力

寰宇記

蠅虎鴻豺以食之也鴈奴虎僕以其為役也

鬼車名姑獲

荆楚歲時記

昔尹吉甫信後妻之讒而殺孝子伯竒其弟伯封求而不得作黍離之詩俗傳云吉甫後悟追傷伯竒出遊於田見異鳥鳴於桑其聲激然吉甫心動曰無乃伯竒乎鳥乃折翼其聲尤切吉甫曰果吾子也乃顧曰伯竒勞乎是吾子棲吾輿非吾子飛弗居言未卒鳥尋聲而棲其蓋歸入門集於井幹之上向室而號吉甫命後妻載

弩射之遂射殺後妻以謝之

陳思王  
惡鳥論

譬如蝙蝠欲捕鳥時則入穴為鼠欲捕鼠時則飛空為鳥而實無有大鳥之用其身臭穢但樂暗冥舍利弗破戒比丘亦復如是既不入於布薩自恣亦不入王者使役不名白衣不名出家如燒屍殘木不復中用

法苑珠林

孔子與子夏渡江見鳥而異之人莫能名孔子曰鷓嘗聞河上人歌云鷓兮鷓兮逆毛衰兮一身九尾長兮

韓詩

外傳

孔子遊于隅山見梓樹上有孤鶻乃承而歌之

琴操

正始元年戴鶻之鳥巢張璠門陰璠告門人曰夫戴鶻陽鳥而巢門陰此凶祥也乃援琴歌咏作詩二篇旬日

而卒

魏志

晉永嘉五年有鶻鳥集于始安縣南其里之鶻陂中民周虎張得之木矢貫以鍤銀其長六尺有半以箭計之其射者人身應長一丈五六尺也

圖經

咸和二年正月饗萬國有五鷗集于太極殿前

晉起居注

弘公患瘡經年後猶至田舍瘡發有數小兒持公手脚  
公見因陽暝忽起捉得一小兒化成黃鷄餘者皆走仍  
縛以還家懸著牕上明當殺之至比曉失鷄瘡遂斷於  
時有瘡者便呼弘公便斷

錄異傳

檀道濟鎮浚陽十二年入朝與家分別顧瞻城闕嗷歔  
涕零時人歌曰生人非死別荼毒當奈何濟時發舟所  
養孔雀來銜其衣以十三年伏誅

異苑

正光二年八月獲禿鷲鳥於宮內詔示崔光光表曰此



即詩所謂有鷺在梁解云禿鷺也性貪之鳥野澤所育不應入於殿庭昔魏氏黃初中有鴉鵂集於靈芝池文帝下詔以曹恭公遠君子近小人博求賢俊太尉華歆由此遜位而讓管寧者也臣聞野物入舍古人以為不善是以張璠惡鷺賈誼忌鵯鵂暫集而去前王猶為至誠况今親入宮禁為人所獲方被畜養晏然不以為懼準諸往義信有殊矣

北史

陳後主時蔣山衆鳥鼓兩翼以拊膺曰奈何帝奈何帝

又有鳥一足集其殿庭以嘴畫地成文曰獨足上高臺  
盛草變為灰欲知我家處朱門當水開解者以為獨足  
蓋指後主獨行無衆盛草言荒穢隋承火運草得火而  
灰及至京師與其家屬館於都水臺所謂上高臺當水  
也

陳書

隋宦者劉繼詮得芙蓉鷗二十四隻以獻毛色如芙蓉  
帝甚喜置北海中曰鷗字三品鳥宜封碧海舍人

宋京師道林寺有沙門僧伽達多博通經論偏以禪思

為業以元嘉之初來遊宋境達多常在山中坐禪日時  
將逼念欲受齋乃有羣鳥銜果飛來授之達多思惟昔  
獼猴奉蜜佛亦受而食之今飛鳥授食何為不可於是

受進食之

梁高僧傳

帝舍臨海頓見大鳥異之詔綽為銘其辭曰維大業八  
年歲在壬申夏四月景子皇帝底定遼碣班師振旅龍  
駕南轅鸞旗西邁行宮次于柳城縣之臨海頓焉山  
川明秀實仙都也旌門外設款跨重阜帳殿周施降望

大壑息清蹕下輕輿警百靈綏萬福踐素砂步碧沚同  
軒皇之襄野邁漢宗於河上想汾射以開襟望蓬瀛而  
載佇窅然齊肅貌屬殊庭兼以聖德遐宣息別風於淮  
雨休符潛感表重潤於夷波壁日曬光卿雲舒采六合  
開朗十洲澄鏡少選之間儵焉靈感忽有祥禽皎同鶴  
鷺出自霄漢翻然雙下高逾一丈長乃盈尋靡霜暉於  
羽翮激丹華於觜距鸞翔鳳跼起鴻騫或蹶或啄載  
飛載止徘徊馴擾咫尺乘輿不藉揮琴非因拊石樂我

君德是用來儀斯固類仙人之騏驥冠羽族之宗長西  
王青鳥東海赤鴈豈可同年而語哉竊以銘基華嶽事  
乖靈異紀迹鄒山義非盡美猶方冊不泯遺文可觀况  
盛德成功若斯懿鑠懷真味道加此感通不鐫名山安  
用銘異臣拜稽首敢勒銘云來蘇興怨帝自東征言復  
禹績乃御軒營六師薄伐三韓肅清龔行天罰赫赫明  
明文德上暢靈武外薄車徒可擾苛慝靡作凱歌載路  
成功允鑠反旆還軒遵林並壑停輿海澨駐驛巖陞宵

想遐凝藐屬千里金臺銀闕雲浮嶽峙有感斯應靈禽  
效祉飛來清漢俱集華泉好音玉響皓質冰鮮狎仁馴  
德習習翩翩絕迹無泯於萬斯年帝覽而善之命有司

勒於海上

隋書

宋昭公夢為鳥味加於南門尾加於北門曰子夢必立  
郢城有華山山上有井有鳥巢其中金喙黑色而團翅  
此鳥見則大水

異苑

張衡嘗作水鳥假以羽翮腹中施機能飛數里

文士傳

梁武帝時有男子不知何許人於大衆中割肉以飼饑鳥血流遍體而顏色不變

晉李奚子東平太守李忠祖母本一山嫗每遇大雪鳥無安枝往往飛集其家遂留不去嫗濟以穀且不敢驚上帝謂有仁心賜令度亡後得道居華陽洞宮真誥

昔有大樹仙者居疏伽河即恒河也側棲神入定積年之久

形如槁木遊禽棲集遺尼拘律果樹名果於其肩上暑往

寒來乘蔭合拱一夕忽從定起欲去其樹又恐鳥驚於

是安忍方便移之移訖乃起天美其德賜號大樹仙

昔佛在世時有一比丘林中誦經音聲雅好時有一鳥  
聞法敬愛在樹而聽時為獵師所射命終緣此善根生

忉利天

賢愚  
經



廣博物志卷四十五